

## Refferendwm yr UE: diweddariad i ymgyrchwyr

Gorffennaf 2015

---

### Ymunwch â'n rhestr ddiweddariadau

Gallwch gofrestru i dderbyn y  
diweddariadau hyn drwy ffonio  
0333 103 1929 neu drwy e-  
bostio

[pef@comisiwnetholiadol.org.uk](mailto:pef@comisiwnetholiadol.org.uk)

Mae Llywodraeth y DU  
wedi ymrwmo i gynnal  
refferendwm erbyn diwedd  
2017 ynghylch p'un a  
ddylai'r Deyrnas Unedig  
barhau i fod yn aelod o'r  
Undeb Ewropeaidd. Nid yw  
union ddyddiad y  
refferendwm yn hysbys eto.

Mae'r Mesur sy'n nodi sut y  
cynhelir y refferendwm a'r  
rheolau y bydd rhaid i  
ymgyrchwyr eu dilyn yn

cael ei ystyried ar hyn o  
bryd gan Senedd y DU.

Rydym yn rheoleiddio cyllid  
a gwariant gwleidyddol. Ein  
nod yw sicrhau  
gonestrwydd a thryloywder  
cyllid a gwariant ymgyrchu i  
bleidleiswyr.

Rydym yn cofrestru  
ymgyrchwyr ac yn rheoli eu  
gwariant mewn refferenda.

Unwaith y bydd y Mesur yn  
dod yn ddeddf, byddwn yn  
cyhoeddi cyfres lawn o  
ganllawiau ar gyfer  
ymgyrchwyr.

Tan hynny, byddwn yn  
cyhoeddi cyfres o  
ddiweddariadau i'ch  
hysbysu.

## Ynglŷn â'r diweddariad hwn

Mae'r diweddariad hwn wedi ei seilio ar Fesur Refferendwm yr Undeb Ewropeaidd ('y Mesur'). Mae Senedd y DU wedi cytuno ar egwyddorion y Mesur ac mae'n ystyried diwygiadau, felly gall peth o'r wybodaeth a ddarperir yn y diweddariad hwn gael ei newid. Byddwn yn tynnu sylw at unrhyw newidiadau i'r Mesur mewn diweddariadau yn y dyfodol.

Mae'r diweddariad cyntaf hwn yn ymwneud â'r canlynol:

- Crynodeb o'n rôl yn y refferendwm
- Gwybodaeth sylfaenol am y refferendwm
- Ble y gallwch gael mwy o wybodaeth

## Ein rôl mewn refferenda

Rydym yn gyfrifol am:

- roi sylwadau ar eiriad cwestiwn y refferendwm
- cofrestru ymgyrchwyr
- penodi grwpiau ymgyrchu arweiniol
- rheoleiddio cyllid ymgyrch
- codi ymwybyddiaeth o'r refferendwm a sut i gymryd rhan
- adrodd ar y refferendwm

Gallwch ganfod mwy am ein rôl a gweinyddiaeth y refferendwm ar [www.comisiwnetholiadol.org.uk](http://www.comisiwnetholiadol.org.uk)

## Beth yw'r cwestiwn?

Y cwestiwn a gynigir yn y Mesur yw:

**'A ddylai'r Deyrnas Unedig ddal i fod yn aelod o'r Undeb Ewropeaidd?'**

Un o'n dyletswyddau statudol yw adrodd ar ba mor ddealladwy yw'r cwestiwn. Byddwn yn cyhoeddi ein hadroddiad asesu ym mis Medi 2015. Bydd yr adroddiad ar gael ar [www.comisiwnetholiadol.org.uk](http://www.comisiwnetholiadol.org.uk)

## Pryd fydd y cyfnod ymgyrchu yn dechrau?

Yn y cyfnod yn arwain at y refferendwm, ceir cyfnod ymgyrchu ffurfiol a elwir yn 'cyfnod y refferendwm'. Nid ydym yn gwybod ar hyn o bryd pryd fydd cyfnod y refferendwm yn dechrau. Mae'r Mesur yn darparu ar gyfer gosod y cyfnod hwn unwaith y daw'r Mesur yn gyfraith.

Yn ystod cyfnod y refferendwm, bydd y rheolau ar wariant ymgyrchu a rhoddion a benthyciadau yn berthnasol, ac yn cael eu rheoleiddio gennym.

## Pwy all ymgyrchu?

Gall unrhyw un wario hyd at £10,000 ar ymgyrchu yn ystod cyfnod y refferendwm.

Os ydych eisiau gwario mwy na hyn, mae'n rhaid i chi gofrestru gyda ni. Ar ôl cofrestru, rhaid i chi gydymffurfio â'r rheolau ar wariant, rhoddion a benthyciadau.

Dim ond rhai unigolion a mudiadau sydd wedi'u lleoli yn y DU yn bennaf a gaiff gofrestru.

Mae'n rhaid i chi gofrestru ar wahân fel ymgyrchydd refferendwm, hyd yn oed os ydych eisoes wedi cofrestru gyda ni fel plaid wleidyddol neu ymgyrchydd nad yw'n blaid.

Byddwn yn agor y gofrestr ymgyrchwyr pan ddaw'r Mesur i rym.

## Penodi ymgyrchwyr arweiniol

Gellir penodi un ymgyrchydd arweiniol i gynrychioli pob canlyniad refferendwm. Bydd ymgyrchwyr cofrestredig yn gallu gwneud cais i ni i gael eu penodi fel yr ymgyrchydd arweiniol ar gyfer y canlyniad y maent yn ei gefnogi.

Mae gan ymgyrchwyr arweiniol rhai buddion ychwanegol megis terfyn gwariant uwch nag ymgyrchwyr cofrestredig eraill.

Mae'n rhaid i ni benodi ymgyrchwyr arweiniol sy'n cynrychioli'r rheiny sy'n ymgyrchu dros y canlyniad y maent yn ei gefnogi. Os oes mwy nag un ymgeisydd addas ar gyfer canlyniad, mae'n rhaid i ni benodi yr un sy'n cynrychioli'r ymgyrchwyr i'r graddau mwyaf.

Byddwn yn cyhoeddi canllawiau i egluro sut y gall ymgyrchwyr wneud cais i fod yn ymgyrchydd arweiniol.

## Terfynau gwariant

Bydd ymgyrchwyr cofrestredig yn destun cyfyngiadau ar faint y gallant ei wario wrth ymgyrchu yn ystod cyfnod y refferendwm.

Gosodir y terfynau ar gyfer pleidiau gwleidyddol yn ôl cyfran y blaid o'r bleidlais yn etholiad cyffredinol diwethaf Senedd y DU.

Ar hyn o bryd, mae'r Mesur yn gosod y terfynau fel a ganlyn:

Ymgyrchydd arweiniol	£7m
Pleidiau gwleidyddol gyda:	
>30% o gyfran o'r bleidlais	£7m
>20-30% o gyfran o'r bleidlais	£5.5m
>10-20% o gyfran o'r bleidlais	£4m
>5-10% o gyfran o'r bleidlais	£3m

<5% o gyfran o'r bleidlais	£700k
Ymgyrchwyr cofrestredig eraill	£700k

## Rhoddion a benthyciadau

O dan y Mesur, mae rhoddion a benthyciadau i ymgyrchwyr cofrestredig yn cael eu rheoleiddio.

Dim ond o ffynonellau 'a ganiateir' penodol, sydd wedi'u lleoli yn y DU yn bennaf, y caiff ymgyrchwyr cofrestredig dderbyn rhoddion neu fenthyciadau dros £500.

Byddwn yn cyhoeddi cyfres o ganllawiau i helpu ymgyrchwyr gydymffurfio â'r rheolau ar wariant, rhoddion a benthyciadau.

## Gofynion adrodd

Bydd yn ofynnol i ymgyrchwyr cofrestredig gyflwyno nifer o adroddiadau cyn y refferendwm, a elwir yn 'adroddiadau cyn y bleidlais', sy'n darparu gwybodaeth am y rhoddion a dderbyniant a'r benthyciadau a gymerant sydd dros £7,500 yn y cyfnod yn arwain at y refferendwm.

Ar ôl y refferendwm, bydd yn ofynnol i ymgyrchwyr cofrestredig gyflwyno ffurflen gwariant ymgyrch a fydd yn cynnwys manylion am y gwariant a wnaethant wrth ymgyrchu yn y refferendwm a phob rhodd a benthyciad a dderbyniwyd ganddynt oedd dros £7500 (neu oedd yn cronni i gyfanswm dros y swm hwnnw o'r un ffynhonnell).

## Ble gallwch ddod o hyd i ragor o wybodaeth

Rydym bob amser yn hapus i roi cyngor i ddarpar ymgyrchwyr ar sut i gydymffurfio â'r rheolau.

Cysylltwch â ni ar 0333 103 1929

[pef@comisiwnetholiadol.org.uk](mailto:pef@comisiwnetholiadol.org.uk)

Fel arall defnyddiwch y cyfeiriadau e-bost isod.

- Cymru:  
[gwybodaeth@comisiwnetholiadol.org.uk](mailto:gwybodaeth@comisiwnetholiadol.org.uk)
- Lloegr:  
[pef@electoralcommission.org.uk](mailto:pef@electoralcommission.org.uk)
- Yr Alban:  
[infoscotland@electoralcommission.org.uk](mailto:infoscotland@electoralcommission.org.uk)
- Gogledd Iwerddon:  
[infonorthernireland@electoralcommission.org.uk](mailto:infonorthernireland@electoralcommission.org.uk)

## I gael gwybodaeth arall am y refferendwm

Ar ein gwefan,

[www.comisiwnetholiadol.org.uk](http://www.comisiwnetholiadol.org.uk),

gallwch ddod o hyd i:

- fwy o wybodaeth am ein rôl mewn refferenda
- ein hegwyddorion allweddol ar gyfer rhedeg refferenda
- ein dull o asesu cwestiynau refferendwm
- ein canfyddiadau ar gwestiwn y refferendwm
- sesiynau briffio ar y Mesur sy'n egluro ein safbwynt ar y darpariaethau lle bo hynny'n briodol
- [canllawiau](#) ar rolau allweddol mewn refferenda